

## REGIONAL NEWS

HEADLINES:-

1. ZPM flagship prog- Banakaih-Handholding Policy kalpui dan tur Chief Minister Pu Lalduhoma hovin ngaihtuah a ni.
2. Home Minister Pu K.Sapdangan, " Ration Card, Assam ramri leh Airport chungchangahte thu belhchian dawl lo hmangin eptuten mipui rilru hruaipen tumin an tithlabar fo a ti.
3. Inrinni atanga Rajasthan-a ruah sur nasa avanga hmun hrang hranga chhiatna thlengah mi 22 an thi tawh.
4. Prime Minister Narendra Modia chuan Olympic-a India infiammite chuan an theihtawp an chhuah thu leh mipuite pawhin an chhuang hle tih a sawi.

&lt;&gt;&lt;&gt;&lt;&gt;

CM

ZPM flagship prog- Banakaih-Handholding Policy kalpui dan tur ngaihtuahin vawiin khan CM Conference Hall ah Chief Minister Pu Lalduhoma hovin Mizoram State Policy Coordination Committee leh Implementing Department hotute an thukhawm a, Chief Minister chuan, Hand Holding Scheme chu tlangzarh an chak tawh a, tihtur tul la awm apiang te chin fel vat vat an duh tawh hle a ti a. He scheme hi bank te nena tangkawpa kalpui tur, central scheme awmsa thenkhatte nena convergence a kalpui tur a ni a. Progress Partner te tana rulh leh ngai hmalakna deuh zel a ni tih sawiin dahkham erawh a ngai lo, a tithate tana interest awm lo a ni thung a ni a ti.

Bana Kaih Policy chu Loan deuh veka kalpui tur a ni chungin eizawna tha taka lo kalpui mek tawh sa, tlemazawnga han puiha hmasawn dawrh thei te puihna tur bik CM Special Package siam a ni dawn tih sawiin, tanpuina sum erawh a tam thei lovang a ti a. He Special Package dawngtu tur hi Implementing Department te bawkin an thlang ang a, an vil zui bawk ang, a ti a. Kumin bik hi pilot project angin an kal phawt ang a, a tul ang zelin an tilian chho dawn a ni, a ti.

Pu Lalmalsawma Pachuau, Member Secretary, MSPCC leh Planning Secretary ni bawk chuan Hand Holding kalpui dan tur duan tawh te sawifiahna a nei a. Pu LP Lalchangkima, MD, ZIDCO chuan Interest Free Loan kalpui dan tur leh guarantor-a sawrkar a tan dan tur ruahmanna te a sawifiah ve bawk.

&lt;&gt;&lt;&gt;&lt;&gt;

MNF COMPLAINT

MNF Legal Board chuan Vanglaini nitin chanchinbu in AMC Ward VI-na independent candidate, MNF candidate anga an ziah chungchangah AMC Ward VI by Election Returning Officer, hnenah lehkha an thehlut a.

He lehkhaah hian, "Vanglaini, Mizo Daily newspaper, Zirtawpni-a chhuakah khan pheh hmaah 'ZPM leh BJP candidate-ten nomination paper an thehlut' tih thupui kaihnawihha thuziakah "MNF Candidate Lalrinfeli chuan August ni 7 khan hming a lo pe lut tawh a ni,' tiin

tarlan a ni a. Hei hi mipui rilru dik lo taka hruai pen tumna a ni tih sawiin, Lalrinfehi hi MNF candidate ni loin, Independent candidate, RO hmaah ngei ah a thehlut a ni an ti a, Hetianga thuziak hi mipuite tichiai thei zawng leh hrereng chungathiltih a ni an ti a, ngaihdam dilna anmahni chanchinbu ngeiah chhuah tura thu pe turin an ngen tih an sawi a ni.

<><><>

#### ZPM PR

Home Minister Pu K.Sapdangan, “ Ration Card, Assam ramri leh Airport chungchangahte thu belhchian dawl lo hmangin eptuten mipui rilru hruaipen tumin an tithlabar fo a ti.

Vawiin khan ZPM chuan Party Office-ah chhung inkhawm hun a hmanga, hetah hian thusawiin Pu K.Sapdanga chuan Eptu party-ten ration card chungchanga mipui thu an fah dan a dik tawk lova, chhungkaw khawsak ziaawm zawk Ration Card var hmangtuten sawrkar atanga buhfai Subsidy-a an leina man tihsannaah hian chhungkaw harsa zawk Ration Card Eng leh Ration Card Pawl hmangtute a huam lo a ti a, tunah hian Supply Minister hmalaknain Ration Card siam that hna kalpui mek a ni a, chhungkaw khawsak harsa zawkte tan phurrit tur a awm lo, a ti.

Home Minister chuan tunhnaia Assam lamin an duty camp bul leimin an thenfai chu eptu party lamin mipui tihthlabarin nan hmangin thu an vawrh darh leh vak mai a, hetiangah thu belhchian dawl lo hmanga mipui rilru an kuai peng thin hi a pawl a ti a. Assam Sorkar nen pawh ramri chungchangah tha takin meeting an nei a, hmasawna hmuh chhoh mek a ni, a ti.

Airport chungchangah pawh Mizoram tana tha tur zirchianna neih anih chauh laiin, eptu party lam chuan thutlukna siamfel ta ang maiin thuthang dik lo an vawrh darh leh chiam mai a ti a, sawrkar tha nei tur chuan Opposition party tha tak neih a ngai a, chuvangin Opposition Party-te pawhin sawrkar tihbuai tum nan thubelhchian dawl lo an hmang fo a, hei hi mipui nuihzat leh rin loh hlawh theihna a ni, a ti.

Home Minister chuan, an hmalakna aikal tihbo chu thenkhatin an huphurhpuiin an tih theih an ring lo hial a, sawrkar hmalaknain department tinah aikal an neih leh neih loh zawh a ni a, aikal ti tawp tura thuchhuah siam a ni bawka, ti tawp lo department an awm chuan department hotuten mawh an phur dawn a ni a ti a. Aikal tih tawp avang hian mipuiin harsatna engemawchen chu an tawk ngei dawn tih sawrkar hotuten an hmu tlang vek a, amaherawh huaisen taka ram siamthat hna kalpui a ngai a, mipui pawh an chhel a ngai hle a, hun a kal anga thil a larawn inher dik mai dawn a ni,” a ti.

<><><>

#### TIRANGA YATRA

India ram zalenna champha lawmna puala ‘Har Ghar Tiranga’ hnuaiyah hnam puanzar nena kawng zawh hun, ‘Tiranga Yatra’ chu vawiin khan Art & Culture Department bultumin Aizawl Chanmari leh Sikulpuikawn inkarah neih a ni.

He hunah hian zirlai naupang 800 chuangin hnam puanzar kengin kawng an zawh a, Vanapa Hall kawt ah intawkkhawmin Deputy Commissioner Pu Lalhriatpuia hovin ‘Har Ghar Tiranga Pledge’ chham rualna hun neih a ni.

DC chuan 'Tiranga Yatra', hnam puanzar nen a kawngzawhna chu India ram a chengte inlungualna leh inpumkhatna tinghet zual tur a buatsaih a nih thu leh mi tinin zalenna hlutzia an hriat thar nan leh chu zalenna humhim tur a ram leh hnam hmangaihna thinlung put a pawimawh thu a sawi.

Khawzawla Mualvawm Field-ah 'Har Ghar Tiranga'pual hian hun hman a ni a, sikul naupang ten Independence Day Parade zir pahin kawng an zawh a, hnam puan zar lek chungin Tuidawnkawn thleng an kal a ni.

Hnahthial Bawrhsap, Pi Rita Lalnunmawii Pachuau kaihhruiin, Govt. Hnahthial High School leh Higher Secondary School zirlaite nen Hnahthial District Volleyball Court-ah 'Har Ghar Tiranga' puala hun hman niin 'Nasha Mukh Bharat Abhiyaan' puala thutiam chham rual nghal a ni.

Siaha District Bawrhsap Pu VL Hruaizela Khiangte kaihhruiin Tiranga Yatra hi DC Office tual zawl atanga tan niin Traffic Point, Siaha Bazar thleng neih a ni a, zirlai naupangte leh mipui thahnem tak ten zalenna sual chhuah nana nunna chan ta te hriat reng nan Hnam puanzar nen kawng an zawh a ni.

Har Ghar Tiranga Campaign hi India hnam puan zar in tina zar tura infuihna beihpui a ni a, Azadi ka Amrit Mahotsav hnuaiia tan a ni. Hnam puan zar hi hnam inpumkhatna tilangtu pawimawh tak a nih avang leh mipuiin hnam puan zar kan ngaihhlut zawk theih nan he beihpui hi kum 2022 khan India sawrkar in kum tina hman atan a tan a ni.

<><><>

#### MPCC PRESS CONF

Mizoram Pradesh Congress Committee (MPCC) chuan sawrkar in sawhthing tha leh thalo an thenna Grade an sawi ang chu mipui ten an tharchhuak thei angem tih chu an zawhna a ni, an ti.

Vawiin khan Aizawl Press Club - ah thuthar lakhawmtute kawmin, MPCC Treasurer Dr. Lalmalsawma Nghaka chuan tunhnaia Agriculture Minister leh Adviser to CM ten sawhthing lei leh hralh chungchanga hmalak an tum dan thenkhat an sawi chu sawhthing chingtute tan him lo leh hahthlawna tur ni the ai an hriat thu a sawi a.

ZPM sawrkar sawhthing then tum danah 'Grade A' chauh cheng 50 leh a chunglama lei tur an ti a, Grade B chu a chingtute leh a leitu te inbiakremna tura an dah chu tha an ti lo hle tih sawiin. Mizoramah Sawhthing hi grade a then anih an hre ngai lova, an then anih chuan Grade then dan tur, a quality eng chen nge tih inkaihhruiina a awm loh bakah a leitu ten 'Grade B' anga sawhthing quality an then teuh chuan a chingtute a tuartu an ni dawn a, hei hi a thalo hle a ni, a ti a.

Khawpui mi sawhthing ching tute ta an leisak dawnlo an ti pawh thalo an tih thu sawiin ZPM chuan an Manifesto angin society a in register te sawhthing leisak an ba a, chutih rualin khawpui mi pawh nise an sawhthing chinna khua a society ah sawhthing a chin anga in register chu an phalsak ngei tur a ni a. Khawpui mi sawhthing ching te hi sawrkar hian a ngaihven tur a ni a, a thlahthlam ngawt bik tur a ni lo, a ti.

Society din chungchangah Society hruiitu tur te chu sawrkar official te lo tawiawm tura beisei an nih laiin, khaw khata rulling party hruiitute an inruat mai niin a lang tih sawi bawkin Sawhthing lei leh hralh hi society kaltlanga siam tur anih dawn si chuan ZPM Membership fee lak nan hman tumna a awm ta mai em ni tih chu an zawhna a ni a ti.

MPCC Treasurer chuan Sawhthing leina tur, Minimum Support Price pekna tur chu a hranpa in Budget ah a awm lova, Banakaih policy hnuaiah vaibelchhe 200 dah a ni a, nikuma thlai thar leina vaibelchhe 110 an dah, an la hman loh nen cheng vaibelchhe 310 awm anga ngaih theih a ni tih sawiin. Sawhthing hi sawrkar chhut danin quintal nuaih 10 vel Mizorama thar tura ngaih a ni a, Sawhthing thar tur sawrkarin a chhutchhuah zat ngaihtuahin a beitham hle tih a sawi bawk a ni.

MPCC Treasurer chuan Sawhthing chawh hun chungchangah ZPM in ruahmanna siam a tum chu ngaihtuahchuan ngai ani a ti bawk a. Sawhthing chu a chawh hunlaia chawh loh chuan sawhthing quality a tlahniam thei a, chuvangin thlai chingtute chawh hunbi siamsak chu a tha lova, a hralh theih hunchhunga an hralh vek theih nan ruahmanna siam turin ZPM sorkar an phut tih a sawi a, Hmunphiah an ti zuzi ang khan tih zuzi chi a ni ve lova, nem liam a, Agent thiamloh a ni ber mai, tih ngawt chi a ni ve lo, chhungkua leh khua a nghawng tam lutuk a ni a ti.

<><><>

#### BJP MIZORAM

BJP Mizoram Political Session vawiina neihah State Core Group Member Dr K Beichhua MLA chuan thusawiin, state lo kaihruai tawh tute zingah mipui hmaa thu sawi teuh teuh a, hnathawh erawh tlem leh thung si an nih vek avangin Mizoram mipuiin ei leh bar zawna kawng ah leh nitin nun phungah pawh angaihna hrelavin laklawh takin, tuilai rapin an awm phah a ti.

Dr K Beichhua chuan, Mizoram mipui te chu nguntaka ngaihtuahna seng turin a sawm tih sawiin, BJP Party erawh chu kalphung nghet leh Vision mumal tak nei a hruai an nihna angin, tawngkam mai nilovin thil tih in ram an thahnem ngai takin an hruai mek a ni a ti.

MLA chuan Tun hnaiah Delhi lamah Ministry te dawrin ni 9 an zuk cham tih sawiin Central Minister hrang hrang te hnen ah Mizoram mamawh an thlen a, Chung zingah Central Agriculture College leh Central Medical College Mizoram tan an dil tih sawiin an thil dilah an hotu ten an duh sak hle a, tih sak ngei an tum thu pawh an hrih niin a sawi a ni.

<><><>

#### RAJASTHAN

Inrinni atanga Rajasthan-a ruah sur nasa avanga hmun hrang hranga chhياتna thlengah mi 22 an thi tawh. Ruahsur tamna te hi Jaipur, Karauli, Sawai Madhopur leh Dausa te niin khawlaiah tui a tling nasa hle a. Thuneitute chuan ruahsur tamna district-ahte chuan sawrkar leh mimal enkawl school te khar turin thupek an chhuah a. Chief Minister Bhajanlal Sharma chuan sorkar official pawimawhte nen thilthleng chungchangah inhmuhkhawm hmanhmawh a ko nghal a. Pu Sharma chuan vanduaiana thlenna hmunahate a tul anga chhanchhuah hna ngawrh taka thawk turin a hriattir nghal a ni.

<><><>

## PM ON OLYMPIC

Prime Minister Narendra Modia chuan Olympic-a India infiammite chuan an theihtawp an chhuah thu leh mipuite pawhin an chhuang hle tih a sawi. Vawiina Social Media-a a thudahah Pu Modia chuan Paris Olympic zawh fel a ni ta tih sawiin he infiamna hunpuia India tana theihtawp chhuah tute chu fakawm an tih thu a sawi a. A hma huna intihsiakna lo awm leh turah duhsakna a hlan bawk a ni.

Paris Olympic 2024 chu nizan khan ropui taka khar a ni a. A pumpuiah US chuan pakhatna a ni a, Gold 40, silver 44 leh bronze 42 lain a vaiin medal ` 126 an la a. China chuan dawtin gold 40, silver 27 leh bronze 24 lain avaiin medal 91 an la a. Japan chu pathumna niin gold 18, silver 19 leh bronze 16 lain medal 45 an la a ni. Kumin intihsiakah hian India chuan silver pakhat, bronze panga nen avaiin medal paruk a la a. A pumpuiah 71 na a ni.

Olympic kharna programme hi Stade de France ah hman a ni a. Mi sing 8 chuang an pungkawm a. India tan Olympic Medallist PR Sreejesh leh Manu Bhaker te chuan ram aiawhin hnam puanzar an keng a ni.

Kum 2028 Olympic hi US khawpui Los Angeles ah nghah a ni ang.

<><><>

## INDIA MALDIVES

External Affairs Minister Dr.S. Jaishankar leh Maldives Foreign Minister Moosa Zameer te chuan Maldives civil service officer 1000 te tana capacity building siamna tur inremna an ti nung. He inremna hi kum 2024-29 thleng diah tur a ni ang.

He thawhdunna hmang hian Maldives civil servant te tan public policy, governance leh field administration lamah tihchangtlun an ni dawn a. India leh Maldives inkar thawhdunna a ti tha zual tura beisei a ni.

<><><>